

Na october 1920 tin habrimento di *scool di sombré*. Nan a cuminsa cu un grupo di 40 mucha-muhé, bao di direccion di Petronilia Kock, Tela Briet y Johanna Geerman. E di promé luna nan por a haci uso di cas di Emiliano de Cuba, y na november e *scool bieu* cu tabata sirbi pa stal y magasin, a ser drechá.

Nini, Tela y Nana mes a sinja traha *sombrénan fini*, esnan di piápa, na Pietermaai caminda tabatin un bon *scool* pa hanja diploma. Cohen-Henriquez, un homber bieu y coho tabata instructor ey nan. Un di e mihó alumnonan di Petronilia tabata Catrien Croes, cu despues a casa cu Mateo Koolman. Su *sombrénan* tabata mas caro cu *otro*nan. El a sinja di su mama traha *sombré latai* (menos fini), y asina e tabatin experiencia caba ora el a bini na *scool di sombré piápa*. Catrien ta conta: "Despues di a traha nan di cabana, nos a huma nan den asufu pa nan sali blanco blanco. Esey tabata ole stinki si. Despues mester a strika nan riba urma di palo, cu hero di strika. Cada bez ora mi ta mira awor e cos riba cual nan ta warda peluca, mi ta corda riba e urma ey, cu ta un forma di cabez pero di palo".



Soeur Amantia ta
duna les di toca orgel.



Carmen Thijsen ta toca pa muchanan canta.

Petronilia ta bisa: "Pastoor Murk a juda nos *scool* hopi. E tabata skirbi cartanan pa cumpra cabana of pa bende *sombré*. Semper e tabata cana cu chuculati den su saco pa duna nos, pasobra nos tabata masha zwak den tempo di hamber".

Segun Maachi Jojo nan por a bende un *sombré di piápa* pa 90 cen pa un grandi (ola) of 75 cen pa media ola. Pa un *sombré latai* nan a paga 45 cen. Hendenan di Playa tabata cumpra nan. Hopi bez nan a paga cu provision. E chiquitonan di latai tabata 4 placa. Catrien tabata traha *sombré te* na 25 florin. Ora nan no por a bende *sombré* mas, nan a sinti nan mes obligá di cera e *scool* na december 1921 caba.